




ԳԵՐԱՇՆՈՐՀ Տ. ՏԻՐԱՅՐ ԵՊԻՍԿՈՊՈՍ ՄԱՐՏԻԿՅԱՆ



Նորապսակ Տ. Տիրայր եպիսկոպոս Մարտիկյանը, ավագանի անունով Տիգրան, ծնվել է 1930 թվականի մայիսի 24-ին, Լիբանանի մայրաքաղաք Բեյրութում։ Իր նախնական կրթությունն ստացել է տեղի ազգային Սա-

հակյան և Աբգարյան՝ նախակրթարաններում։ Նախնական ուսումն ավարտելուց հետո, 1944 թվականին, նա ընդունվել է Երուսաղեմի Սրբոց Հակոբյանց Ժառանգավորաց վարժարանը, որտեղ սովորել է մինչև հայրենիք վերադառնալը։

1947 թվականին նա եկել է Հայաստան և իր ծնողների հետ միասին հաստատվել Երեւանում, Նույն տարին ընդունվել է Երևանի օտար լեզուների ինստիտուտի անգլիական բաժնում և սովորել մի քանի ամիս։ Սակայն, իր ծնողների ցանկությունն է եղել, որ իրենց որդին ստանա հոգևոր կրթություն, ուստի և նա թողել է ինստիտուտը, դիմել Ս. Էջմիածնի Հոգևոր Ճեմարանը, որտեղ և ընդունվել է ու սովորել։

1952 թվականին փայլուն հաջողությամբ ավարտելով Հոգևոր Ճեմարանի լսարանական բաժինը, սարկավազ է ձեռնադրվում և նշանակվում քարտուղար Հոգևոր Ճեմարանի։

1955 թվականի ապրիլին, Մաղկազարդի օրը, Ս. Հռիփսիմեի տաճարում, կուսակրոն քահանա է ձեռնադրվում գերաշնորհ Տ. Սահակ եպիսկոպոս Տեր-Հովհաննիսյանի ձեռքով, վերանվանվելով Տ. Տիրայր արքեպիսկոպոս։

Նույն տարվա վերջերին նշանակվում է Բաքվի հայոց հոգևոր հովիվ և թեմական խորհրդի անդամ-քարտուղար։

1956 թվականի հոկտեմբերին, Մայր Տաճարում, Ամենայն Հայոց Վեհափառ Հայրապետին ստանում է մասնավոր վարդապետական իշխանություն։

1957 թվականին նշանակվում է առաջնորդական տեղապահ Բաքվի հայոց թեմի:

1958 թվականին, Վեհափառ Հայրապետի կարգադրությամբ, ղատկական տոների առթիվ հովվական այցելության է մեկնում Ռումինիայի ու Բուլղարիայի թեմերը:

1958 թվականի աշնան ընտրվում է Ադրբեջանի հայոց թեմի առաջնորդ, ուր պաշտոնավարում է երկու տարի, ուշադրության արժանի բարեջանությամբ:

1960 թվականին ընտրվում է Բուլղարիայի և Ռումինիայի հայոց թեմերի առաջնորդ, պաշտոններ, որոնք վարում է ցարդ նվիրումով և արդյունավետությամբ, համերաշխ համագործակցությամբ թեմերի պատկառելի թեմական խորհուրդների:

1964 թվականի հոկտեմբերին պարգևատրվում է «Ռումինական Հանրապետության ապտոլ» շքանշանի 4-րդ աստիճանով:

1964 թվականի նոյեմբերի 29-ին, Մայր Տաճարում, եպիսկոպոս է ձեռնադրվում Ամենայն Հայոց Վեհափառ Հայրապետի ձեռքով, Գերագույն Հոգևոր Խորհրդի միջնորդությամբ և Ռումինիայի ու Բուլղարիայի հայոց թեմական խորհուրդների գրավոր ընծայության թղթերի հիման վրա:

Նորապսակ Տ. Տիրայր եպիսկոպոսը գտնվում է իր ուժերի և շնորհների ծաղկման շրջանում:

«Էջմիածին» ամսագրի խմբագրությունը ջերմորեն շնորհավորում է Տ. Տիրայր եպիսկոպոսին և վստահություն է հայտնում, որ նորապսակ սրբազանը, իր ապագա եռանդուն ու անձնվեր պաշտոնավարությամբ, միշտ կվայելի Ամենայն Հայոց Վեհափառ Հայրապետի բարձր զնահատությունը և իր թեմերի հավատացյալ ժողովրդի վստահությունն ու հարգանքը:

